

«Յամին 1417, Պարսիկ ոմն Յուսուփ անուն ի Դավրէժ քաղաքէ թշնամի Քրիստոնէից ի մանկութենէ . տեսեալ յանուրջրս զհաւոր ատեանն Քրիստոսի, և զի սպառնալիք տանջանաց ի վերայ նորա կային, եթէ կացցէ ի նմին անհաւատութեան . զարնուրեցաւ յոյժ, և զարթուցեալ ի քնոյն զնոց առ Ստեփաննոս վարդապետ Լալուկ անուանեալ¹⁾ և Մկրտեալ ի նմանէ կոչեցաւ Սահակ: Զայս իմացեալ Պարսից կալան զնա և յետ բազում դառն տանջանաց քարկոծեալ՝ այրեցին հրով զմարմին սրբոյն և ծագեաց լոյս սաստիկ ի նմին զիշերի»:

Իսկ Յայտաւուրքն մեր ի 18ն ապրիլի, այսպէս պատմէ . «Անկէի ԺԱ. և ապրիլի ԺԸ. ՊԿԶ. (1417 ամի Տեառն) վկայութիւն սրբոյն Սահակայ Նահատակ վարդապետի:

«Սա էր ի մայրաքաղաքէն Զահաստանայ, այս է ի Թարվիզոյ՝ ազգաւ Պարսիկ և հաւատովն տաճիկ, անուամբ Յուսուփ՝ յոյժ չարաբարոյ և ժանդ՝ ի տիս մանկութեան՝ վայրագնաց և յանդուգն՝ հալածիչ Քրիստոնէից, ոչ ունելով բնաւ պակասութիւն չարեաց, այլ բոլորովին կամարար սատանայի և արքանեկաց նորա:

«Եւ յաւուր միում երեւեցաւ նմա Քրիստոս, ի տեսեան՝ նստեալ յատեան, զարնուրեցաւ և զերիս աւուրս որպէս մեռեալ անկաւ յերկիր Յուսուփն այն:

«Եւ ապա ուշաբերեալ զարթեաւ և պատմեաց հօրն իւրոյ և եղբարցն զտեսիլն և ասաց, թէ ճշմարիտ Քրիստոս Աստուած է և որդի Աստուծոյ:

«Եւ երթեալ առ քահանայսն Հայոց՝ պատմեաց նոցա և մկրտեցաւ (ի վանս սուրբ Ստեփաննոս նախավկայի Զամբայ.) և փութով ուսաւ զգիրն Հայոց ի շնորհացն Աստուծոյ, գիտէր և գտաճկաց զիրան և էր յոյժ արագամիտ: Մինչ զի մեկնէր զամենայն զիրս Աստուածային ճին և նոր Կտակարանաց:

«Էր և կարի տրամաբանող ընդ պարսից, և ընդ երկարնակ հերձուածողացն: Եւ փոյթ ի պատասխանիսն, ուղղա-

¹⁾Աւանդութեամբ ասի ի վանս Համբայ Ա. Նախավկայի, որ ի Մաղարայ լերին: